



Doris J. Jensen
Siunut sinnerlugit Inatsisartunut ilaasortaq

§ 37 naapertorlugu apeqquut 294/2018-imut akissut

1. Peqqinnissamut Naalakkersuisoq aperissavara immikkut suliniutit suut aallartisarniarneqarpat?

Akissut:

Atoqatigiinnikkut peqqissuunissaq eqqarsaatigalugu pitsaaliuineq peqqissutsimillu siuarsaanissaq pingaernerutillugit salliutinneqartariaqarput. Pitsaaliuineri maanna ili-uuserineqartut misissorneqassapput, taamaalilluni siunissami qanoq allaanerusumik ili-uuseqarsinnaaneq paasinarsinnaaqqullugu. Pitsaaliuineri iliutsit nunap immikkoortuini assigiinngissutsinut naleqqussarlugit suliaq aallartinneqassaaq.

Pitsaaliuineri iliutsit pitsanngorsarniarlugit suliaqarnermi inuusuttut suliniummi peqataatinneqarnissaat anguniarneqarpoq. Peqataatitsineq ilaatigut atuarfiit, atuartut siunnersuisoqatigiit peqatigiiffiillu aqputigalugit pisinnaavoq. Tamatuma aamma nassatarisavaa atoqatigiinnikkut peqqissuuneq pillugu assigiinngitsunik suliaqartut akimorlugit suleqatigiinnerup aallunneqarnera annertusineqassammat. Ajornartorsiutit taakku peqqissutsimut suliaqarfimmit kisimi aqqiiviginiarneqarsinnaanngillat. Ilinniartitaanermut suliaqarfik ilaatigut peqataatinneqassaaq, taamaalillutillu atuarfiit ilinniartitaanik pisariaqartitaanik atortoqarsinnaaqqullugit ilinniartitsisullu piareersarsinnaaqqullugit, taamaalillutillu ilinniartitsisut atuarfimi atoqatigiinneq pillugu atuartitsinermik ingerlatsinissamut piginnaasaqarnermik misigisaqaqqullugit. Qulequttap annertunerusumik aalluneratigut atoqatigiinnikkut peqqissuuneq inuiaqatigiinni pissusissamisoortumik ilaalersisavaa.

Aammattaq Inuuneritta III-p suliarineqarnissaanut pilersaarusiormi suliaqartut Peqqissutsimut Naalakkersuisoqarfimmit aallartinneqarput, tamatumani atoqatigiinnikkut peqqissuuneq innuttaasut peqqissuunissaannut pilersaarutissami nutaami 2020-mit atuutilersussami immikkoortutut nutaatut ilaatinneqassalluni. Taamaaliornikkut atoqatigiinnikkut peqqissuunermik suliniuteqarnerup ataavannerusumik ingerlanneqarnissaa qulakkeerneqassaaq.

2. Sinerissami qaammatit tamaasa kinguaassiuutitigut nappaatit nalunaarusiarineqartalissappat?

Akissut:

Kinguaassiuutitigut nappaatit klamydiap aamma gonorép nalunaarsorneqartarnerat qarasaasiakkut ataatsimut periutsimi ataatsimoorinneqarput. Tamatuminnga pisariaqartitsineq nalilerneqarpat Nunatsinni Nakorsaaneqarfik kisitsisinik aalajangersunik aallersinnaapput, tamannalu isumaqarpoq ineriartorneq ullumi qanimut malinnaavigineqarsinnaareersoq.

30-11-2018
Sags nr. 2018 - 23860
Akt nr. 9403654

Postboks 1160
Tlf: 34 50 00
Fax: 34 55 05
3900 Nuuk
Email: pn@nanoq.gl
www.naalakkersuisut.gl

Nappaat syfilis paasineqarnerani inuit ataasiakkaat Nunatsinni Nakorsaaneqarfimmut nalunaaruteqartussaatitaapput, tamannalu ingerlaavartumik pisarpoq. Annertuneru-sumik kinguaattooruteqartoqartarnerat nalinginnaasuunngilaq. Nalunaarutigineqartut ingerlaavartumik nalunaarsorneqartarput aammalu kisitsisit nutaat qaqugukkulluunniit pissarsiarineqarsinnaallutik. Taamatuttaaq nappaat HIV paasineqarnerani inuit ataasiakkaat atii taanagit Nunatsinni Nakorsaaneqarfimmut nalunaaruteqartussaatitaapput, tamannalu aamma ingerlaavartumik pisarluni. Qaqugukkulluunniit ullumikkut killiffiusoq Nunatsinni Nakorsaaneqarfimmi ilisimaneqarpoq.

3. Veneriami sulisut amerlisarneqassappat?

Akissut:

Suliniut peqqinnissaqarfimmi taassumalu avataani nalilersorneqaqqissaaq. Kinguaassiuutitigut nappaatinik pitsaaliuineq aallaqqaammut pingaarnerutillugu salliutinneqassaaq aammalu najukkanut naleqqussakkanik pitsaaliuinermi iliuusissanik suliaqartoqassalluni, tamatumani ingerlatsiveqarfiit arlallit kiisalu inuusuttuaqqat peqataatinneqassallutik. Tamanna veneriami sulisut amerlineqarnissaannik pisariaqartitsiffiussanersoq nalilissallugu maannangaaq ajornakusoorpoq.

Inussiarnersumik inuulluaqqusillunga


Martha Abelsen